

याकूबसे भिबा चिठी

चु चिठीला बारेरी पाङ्तो:मा

भिबा म्हि: येशूला आले याकूबसे भिबा मुबा (याकूब १:१, मत्ती १३:५५, मर्कूस ६:३)।

भिबा ग्ला: यरूशलेम शहररी भिबा मुबा।

भिबा साल: ओस्पन ईश्वी संवत् ६० (विक्रम संवत् ११७) सालरीक्यार भिबा मुबा। तर कोइ कोइ बाइबल विद्वानगदेसे ईश्वी संवत् ५० (विक्रम संवत् १०७) साल भन्दा डाच्छा भिबा मुबा भिसी पाङ्बा मुला। थेतबासेलमा चु चिठी छार कबुलला जम्मान भन्दा डाच्छा भिबा किताब तखम्ला।

खाल्दा भिबा: जम्बुलिङला ग्ला ग्लारी ससा बडबड तसी चिबा येशूदा विश्वास लबा यहूदी म्हिगदेदा भिबा मुबा।

चु चिठीरी विश्वास लबागदे खाहङ् लसी भ्रतो:ला भिसी विश्वास लबागदेदा तो:बा ज्ञान बुद्धिदेन मण्डलीदा च्याबा म्हिंला बारेरी अर्ती पिन्बा मुला। चु अर्ती पिन्मा याकूबसे थरी थरीला उखानगदे पाङ्बा मुला। ओच्छे विश्वास लबागदेसे थोतो:बा बानीबेहोरला बारेरी चुहङ् भिसी भिबा मुला। फ्युक्पोदेन प्राडबो भिसी खालैला ली च्यासी गे थालउ, ज्यबा व्यवहार लउ, खालैदा लेबाफेबा थालउ, डाह थालउ, खालैदा बिरोध थालउ, म्हिंला तामगन थालउ, घमण्ड थालउ, जस्तोन दुख तसै नागो ओच्छे प्रार्थना लउ।

चु चिठीरी विश्वास लबा जे आहिन, तर विश्वास लबा अन्छारला गेणोन लतो:ला भिसी पाङ्बा मुला।

मुल तामगदे

- फ्याफुल्बा १:१
- विश्वासदेन ज्ञान बुद्धि १:२-८
- फ्युकपोदेन प्राडबो १:९-११
- दुख नाबादेन सेम च्याबा १:१२-१८
- बचन ड्यान्सी थे अन्छारला गे लउ १:१९-२७
- ली च्यासी गे थालउ २:१-१३
- विश्वास अन्छारला गे २:१४-२६
- सुड तहरी थान्गो ३:१-१८
- जम्बुलिङला स्हेगदेदेन विश्वास लबागदे ४:१-५:६
- चिठीला थुमरी भ्रिबा तामदेन अर्गु अर्तीगदे ५:७-२०

याकूबसे भिबा चिठी

१ लास्सो, परमेश्वरदेन प्रभु येशू ख्रीष्टला गे लबा डा याकूबग्याम जम्बुलिङला ग्ला ग्लारी ससा बडबड तसी चिबा ख्रीष्टदा विश्वास लबा च्युक न्ही वंशला म्हिगदेदा[†] फ्याफुल्ला।*

विश्वासदेन बुद्धि

२ डाला ज्योज्यो आले नाना आडागदे, एनीगदेथोरी थरी थरीला आपत विपत खमा चु ताङ्तोःबा ताम हिन्ना भिसी म्हन्गो। ३ तिगदा भिसम चुहड्बा दुख नामाहेन्से एनीगदेला विश्वासग्याम अभ् एनीगदेसे घेन घेन दुख नाखम्ला भिबा ताम एनीगदेदा थानोन मुला। ४ थेतबासेलमा एनीगदेथोरी खबा जम्मान दुख पूरान नागो। चुहड् लजी भिसम एनीगदे जस्तोन दुख तसैनोन नाखम्बा पाको म्हि दोला।

५ तर चुदे एनीगदे न्हडरी खालैदा ज्ञान बुद्धि आरेसम थेसे आछेर्ना पिन्बा

परमेश्वरदेन छ्याम हीगो। ओच्छे परमेश्वरसे थेदा पिन्ना। ६ तर थे म्हिसे तिगै शङ्का आलना परमेश्वरग्याम याङ्ला भिबा विश्वास लसी हीगै। शङ्का लबा म्हि चा लाबासे रेःना लबा समुन्द्रला छाल हड्बान हिन्ना। ७ थेहड्बा शङ्का लबा म्हिसे चा परमप्रभुग्याम तिगै स्हे याङ्ला भिसी थाम्हन्गो। ८ तिगदा भिसम थेहड्बा सेम क्लाड्बा म्हिसे चा लबारी म्हाड्बा खजिबै गे पूरा लबारी आखम।

प्राडबोदेन फ्युकपो

९ प्राडबो ज्योज्यो आले नाना आडागदे, एनीगदे ताङ्गो। तिगदा भिसम परमेश्वरसे एनीगदेदा घेन म्हि स्होबा मुला। १० ओच्छे फ्युकपो ज्योज्यो आले नाना आडागदे एनोन ताङ्गो, तिगदा भिसम एनीगदेला धन सम्पत्ति परमेश्वरला डाच्छा तिगै आहिन। तिगदा भिसम फ्युकपो म्हि चा हिला म्हेन्दो हड्बान सम्सी निला।

१:१ “च्युक न्ही वंशला म्हिगदे” भिबा चा यहूदी हिन्ना। तर याकूबसे पाङ्बा चु ताम चा यहूदीगदेला लागिरी जे आहिन, ख्रीष्टदा विश्वास लबा जम्मान म्हिगदेला लागिरी हिन्ना।

१:१ मत्ती १३:५५; मार्क ६:३; मुल १५:१३; गला १:१६

११ तिग्दा भिसम खरेडी तमा धिनीसे क्रोसी म्हेन्दोला दोड स्याङ्सी निला। ओच्छे ओते जेबा म्हेन्दो ताङ्सी नाश तला। थेहङ् लसीन फ्युक्पो म्हि एनोन हाडला गेरी कोल्ना कोल्नान नाश तला।*

१२ जस्तोन दुख तसैनोन नासी चिखम्बा म्हि चा परमेश्वरग्याम मोलम याङ्बा म्हि हिन्ना। थेहङ्बा दुख नासी जिन्माहेन्से थेसे जुकजुकधोनाला जुनी याङ्बा इनाम याङ्गला। थे इनाम चा परमेश्वरसे हाडदा माया लबा म्हिगदेदा पिन्ना भिसी कबुल लबा मुला।

१३ परमेश्वरसे खालै म्हिला सेम च्यामा, थे म्हि फसब तजी भिसम थेसे डादा परमेश्वरसे फसब लजी भिसी थापाङ्गै। तिग्दा भिसम परमेश्वर हाडएनोन आज्यबा तामरी फसब आत। ओच्छे म्हिदाएनोन आज्यबा तामरी फसब आल। १४ तर जम्मान म्हि हाडलान आज्यबा सेमसे लोभ उन्सी फसब तमुला। १५ हाडलान आज्यबा सेमसे लमा पाप थोन्ना। ओच्छे थे पाप पूरान बढब तमाहेन्से नाश लला।

१६ थेतबासेलमा डाला सेम निबा ज्योज्यो आले नाना आडागदे, एनीगदेसे हाडसे हाडदान धोका थापिन्गो। १७ यहाडसे याङ्बा जम्मान ज्यबादेन चोखो मोलमगदे चा मुला लनी धिनी स्होबा यहाडला परमेश्वर

आबाग्यामसेन खमुला। ओच्छे घरिघरि पोसी चिबा क्रिप हङ् लसी परमेश्वर खाइमै आपो। १८ परमेश्वरसे हाडलान सेमसे सत्य बचनग्याम यहाडदा हाडला म्हि स्होजी। तिग्दा भिसम परमेश्वरसे स्होबा जम्मान स्हेगदे न्हडरी यहाडदा चा थेसे हाडलान लागिरी धम्जी।

परमेश्वरला बचन ड्यान्सी थे अन्छारला गे लउ

१९ थेतबासेलमा सेम निबा डाला ज्योज्यो आले नाना आडागदे, एनीगदेसे हाडला ताम पाङ्बा भन्दा डाच्छा ज्यना लसी ड्यान्गो। ओच्छे योना बोमो थाखउ भिबा ताम एनीगदे जम्मासेन घोउ। २० तिग्दा भिसम म्हिला बोमोसे परमेश्वरसे म्हन्बा अन्छारला गे खाइमै लबारी आखम। २१ थेतबासेलमा थेहङ्बा जम्मान आज्यबा बानीबेहोरदेन नइबा ताम रूलागो। ओच्छे परमेश्वरसे एनीगदेला सेमरी थान्बा बचनदा सोजो तसी सदन थोसी भ्रउ। चुनोन बचनरी एनीगदेदा थार्ना लबा शक्ति मुला।

२२ एनीगदेसे चु बचन ड्यान्बा जे आहिन, बचन अन्छार गे एनोन लउ। तर बचन ड्यान्सी जे हाडसे हाडदान धोका थापिन्गो। २३ खालै म्हिसे बचन चा ड्यान्सी बचन अन्छार गे

आलनी भिसम थे म्हि चा ऐनारी ली च्याबा म्हि हड्बान हिन्ना। ^{२४}थेसे ऐना च्यातेधोना जे हाडला ली चुहड्बा मुला भिसी था याड्मुला। तर ऐना च्यासी निमाहेन्से थेसे हाड खाहड्बा मुला भिबा ताम तुरुन्तन म्लेःला। ^{२५}तर जुन म्हिसे थार्ना लबा परमेश्वरला ठिम अन्छार सेम लसी ड्यान्सी भ्रला, थेसे परमेश्वरला बचन आम्लेःना गेएनोन लला। थेहड्बा म्हिदा चा हाडसे लबा जम्मान गेरी परमेश्वरसे मोलम पिन्ना।

^{२६}चुदे खालैसे हाडसे हाडदान डा परमेश्वरदा तेन्बा म्हि हिन्ना भिसी भिला, तर हाडला सुड चा तहरी आथान्नी भिसम थेसे हाडसे हाडदान धोका पिन्बा हिन्ना। थेतबासेलमा थेसे परमेश्वरदा तेन्बा ताम तिगै गे आखेलबा तला। ^{२७}परमेश्वर आबादा सेम निबा चोखोदेन सत्य तेन्बा ताम चा दुखरी परब तबा हेम्बो सिबा भ्रिडम्हेमेगदेदा हो लबादेन टुहुरा कोलागदेदा सयार लबा हिन्ना। ओच्छे जम्बुलिडला जम्मान आज्यबा तामगदे ख्लाबा हिन्ना।

ली च्यासी गे थालउ

२ डाला ज्योज्यो आले नाना आडागदे, एनीगदेसे यहाडला जम्मान भन्दा घ्रेन यहालदेन शक्ति मुबा प्रभु येशू ख्रीष्टदा विश्वास लबासे लमा एनीगदेसे खालैला ली च्यासी गे थालउ। ^२चुदे एनीगदे हुप

तसी प्रार्थना लबा ग्लारी ज्यबा ज्यबा क्वानदेन म्हरला च्याप क्वान्बा फ्युकपो म्हिदेन भाकटा भोक्टो क्वान क्वान्बा प्राडबो म्हि खबा धुइरी ^३एनीगदेसे ज्यबा ज्यबा क्वान क्वान्बा फ्युकपो म्हिदा चा मान लसी, “तोर ठिरीन धन्छ्यागो” भिबा, तर प्राडबो म्हिदा चा “थेरीन राप्सी चिसै चिउ, सरीन चिसै चिउ” भिसी पाड्जी भिसम, ^४एनीगदेसे हाड हाड न्हडरीन ली च्यासी गे लबा आहिन? एनीगदेसे चुहड्बा गे लमाहेन्से तिग एनीगदे पापी सेम थोसी निसाफ लबा म्हि आदोनी?

^५डाला सेम निबा ज्योज्यो आले नाना आडागदे ड्यान्गो, तिग परमेश्वरसे जम्बुलिडला प्राडबोगदेदा विश्वासरी फ्युकपो दोना लसी हाडला यहुल्सारी वाड्म्याड्बा हक पिन्बारी धम्बा आहिन? चुनोन यहुल्सा परमेश्वरसे हाडदा माया लबागदेदा पिन्ना भिसी कबुल लबा आहिन? ^६तर एनीगदेसे प्राडबोगदेदा हेला लमुला। तिग फ्युकपोगदेसे एनीगदेदाएनोन दुख आपिन्मुला? थेनोन फ्युकपोगदेसे एनीगदेदा अदालतरी आभोर्मुला? ^७तिग येशू ख्रीष्टला मिन लसी एनीगदेदा थान्बा मिनना बेइज्जत लबा थेनोन फ्युकपोगदे आहिन?

^८चुदे एनीगदेसे “हाडला खिम्जेम-गदेदा हाडदा हड्बान माया लउ” भिसी बचनरी भ्रिबा परमेश्वरला यहुल्साला मुल ठिम अन्छार पक्कान

भ्रजी भिसम एनीगदेसे ज्यबा गे लबा हिन्ना। * ६तर एनीगदेसे प्राडबोदेन फ्युकपोला ली च्यासी गे लजी भिसम एनीगदेसे पाप लबा हिन्ना। ओच्छे परमेश्वरला ठिमसेनोन एनीगदेला दोष उन्ना। १०तिगदा भिसम खालै म्हिसे परमेश्वरला ठिम न्हडरी मुबा ताम गिक जे आङ्यान्सैनोन ठिमरी मुबा जम्मान तामला दोष थेशोरी खला। ११तिगदा भिसम “स्थहान्दोदेन छ्याम ब्रेल्सी थाभ्रउ” भिसी सुड्बा परमेश्वरसेन “म्हिएनोन थासाइगो” भिसी सुड्बा हिन्ना। थेतबासेलमा स्थहान्दोदेन छ्याम ब्रेल्सी आभ्रसैनोन म्हि चा साइजी भिसम एनीगदे परमेश्वरला जम्मान ठिम आङ्यान्बा म्हि दोला। * १२थेतबासेलमा एनीगदेसे चु ताम ढन्गो, एनीगदेसे पाड्बा तामदेन एनीगदेसे लबा गेग्याम फेबा ठिमसेन एनीगदेला निसाफ लला। १३तिगदा भिसम स्थहान्दोदा दया आलबा म्हिदा परमेश्वरसेनोन निसाफ लबा धुइरी थेदा दया आल। तर स्थहान्दोदा दया लबा म्हिदा परमेश्वरसेनोन दया लला ओच्छे परमेश्वरसे निसाफ लबा धुइरी थे लोड्आतोः।

विश्वास अन्छारला गे

१४च्यागो, डाला ज्योज्यो आले नाना आडागदे, खालै म्हिसे “डाइ

विश्वास लबा मुला” भिसी पाड्ला, तर गे चा आलसम थेसे लबा विश्वासला तिग गे? तिग थेहड्बा विश्वाससे थेदा थाना लला? १५चुदे खालै ज्योज्यो आले नाना आडादा चबादेन क्वान्बा तिगै आरे। १६तर एनीगदे न्हडला खालैसे थेदा “ढुकक तसी निउ ओच्छे ज्यबा चबा क्वान्बा लउ” भिसी थेला लहुइदा तोःबा स्हे चा आपिन्नी भिसम एनीगदेसे पाड्बा तामला तिग गे? १७थेतबासेलमा विश्वास जे लसी आत। तर विश्वास अन्छारला गेएनोन लतोःला। चुदे विश्वास अन्छार गे आलनी भिसम थेहड्बा विश्वास सिबा हड्बान हिन्ना।

१८तर खालै म्हिसे “एसे विश्वास लमुला, डाइ गे लमुला” भिजी भिसम थेदा डाइ पाड्ला, “लु, दाहेन्से एसे गे आलना एला विश्वास उन्गो। डाइ गे लसी डाला विश्वास एदा उन्ना।” १९एनीगदेसे परमेश्वर गिक जेन मुला भिसी विश्वास लमुला। थे ज्यबान ताम हिन्ना। थेहड्बा ताम मी म्हड म्हुडसेनोन विश्वास लमुला। तर परमेश्वर म्हाड्माहेन्से थेनीगदे यार्मुला।

२०मूर्खगदे, विश्वास अन्छारला गे आलनी भिसम थेहड्बा विश्वास तिगै गे आखेलबा तमुला भिसी एनीगदेदा उन्तोःला? २१य्हाडला म्हेमे अब्राहामएनोन विश्वास अन्छारला

गेग्यामसेन परमेश्वरदा सेम निबा म्हि दोबा मुबा भिबा ताम एनीगदेदा था आरे? परमेश्वरसे कुल्बा अन्धारला थेसे हाडलान भा इसहाकदा बलि फुल्बारी बलि फुल्बा ग्लाथोरी थान्जी। * २२ अब्राहामसे विश्वासदेन छ्याम छ्यामनोन गेएनोन लजी। ओच्छे गेग्यामसेन थेला विश्वास पूरा तबा ताम एनीगदेसे म्राड्बा मुला। २३ “अब्राहामसे परमेश्वरदा विश्वास लबासे लमा परमेश्वरसे थेदा हाडदा सेम निबा म्हि हिन्ना भिसी सुड्जी” भिसी परमेश्वरला बचनरी भिबा ताम पूरा तबा मुबा। ओच्छे अब्राहाम परमेश्वरला ह्येनोन दोजी। * २४ थेतबासेलमा च्यागो, परमेश्वरदा सेम निबा म्हि दोबारी यहाडसे विश्वास जे आहिन, तर विश्वासदेन छ्याम छ्याम गेएनोन लदोमुला।


२५ थेहड् लसीन राहाब भिबा बेश्याएनोन थेला गेग्यामसेन परमेश्वरदा सेम निबा म्हि दोजी भिबा ताम एनीगदेदा थानोन मुला। तिग्दा भिसम थेसे थेरी चिवा लबारी खबा यहूदीगदेदा क्योड्जी। ओच्छे थे ग्लाला म्हिगदेग्याम जोगब लसी अर्गु ग्यामसे पुड्जी। * २६ आत्मा आरेमाहेन्से म्हि सिबा हिन्ना, थेहड् लसीन विश्वास अन्धारला गे आलनी भिसम थेला विश्वासएनोन सिबा हिन्ना।

सुड तहरी थान्गो

३ डाला ज्योज्यो आले नाना आडागदे, एनीगदे न्हडरी ल्हानान स्थान्दोदा लोप्बा म्हि थादोगो। तिग्दा भिसम परमेश्वरसे यहाड स्थान्दोदा लोप्बा म्हिला निसाफ लबा धुइरी यहाडला ल्हानान ताम म्हाइला भिबा ताम यहाडदा थानोन मुला। २ यहाड जम्मासेन ल्हानान गल्ती लमुला। तर जुन म्हिसे होशियार लसी ताम पाड्ला थे चा पाको म्हि दोला। ओच्छे हाडसे हाडदान तहरी थान्बारी खम्ला।

३ चुदे तागदेदा तहरी थान्बाला लागिरी थेनीगदेला सुडरी लगाम क्वान्जी भिसम थे घेन मुसैनोन यहाडसे थेदा भोर्गे म्हन्बा ग्लारी भोर्बारी खम्ला। ४ च्यागो, पानी जहाजगदेएनोन गाते घेन मुला, ओच्छे थे लाबाला तोडसे भ्रमुला। तसैनोन थे चलब लबा म्हिसे सिडला जजाबा क्याबाला भररी हाडदा भोर्गे म्हन्बा ग्लारी भोर्खम्मुला। ५ थेहड् लसीन यहाडला लेएनोन लहुइला जजाबा स्हे हिन्ना, तसैनोन थेसे घेन घेन ताम लमुला।

च्यागो, मेला जजाबा फिलिडगो गिकसेन घेन घेन हि क्रोसी नाश लमुला। ६ थेतबासेलमा यहाडला लेएनोन मे हड्बान हिन्ना। तिग्दा



सिङला जजाबा क्याबा (३:४)

भिसम चु य्हाङला ल्हुङला जम्मान
भन्दा नङबा गे लपुङ्बा स्हे हिन्ना।
चुसे य्हाङला पूरान जुनी न्होङ्ना
लसी नर्गला मेरी भाङ्मुला। ओच्छे
थे ह्वाङएनोन नर्गला मेसे क्रोसी नाश
तमुला।

७म्हिसे जम्मान खाल्ला जन्तुगदे,
जम्मान खाल्ला चराचुरुङ्गीदेन
सरी भ्रबा जन्तुगदे ओच्छे समुन्द्रला
जन्तुगदेदा तहरी थान्खम्मुला ओच्छे

तहरी थान्बाएनोन मुला। ८तर लेदा
चा खालैसेन तहरी थान्बारी आखम।
तिग्दा भिसम ले पापदेन लोङ्बा खबा
बिखसे प्लिङ्बा कुटिसी आचिबा
स्हे हिन्ना।

९चुनोन लेसे य्हाङसे प्रभु परमेश्वर
आबाला जयजयकार लमुला भिसम
चुनोन लेसे परमेश्वरसे ह्वाङलान रुपरी
स्होबा म्हिदाएनोन के:मुला।* १०चु
सुङग्यामसेन मोलमएनोन पिन्मुला,

म्हिदाएनोन के:मुला। तर डाला ज्योज्यो आले नाना आडागदे, चु चा य्हाडसे लबारी आतबा ताम हिन्ना।
 ११तिग मुहान गिकग्यामसेन कम्बादेन डम्बा क्युइ प्योला? १२डाला ज्योज्यो आले नाना आडागदे, तिग अञ्जीरला दोडरी जैतून रोला? ओच्छे अडगुरला दोडरी अञ्जीर रोला? थेतबासेलमा कम्बा क्युइ प्योबा मुहानग्यामसेन खाइमै डम्बा क्युइ आप्यो।

थरी न्हीला ज्ञान बुद्धि

१३एनीगदे न्हडरी ज्ञान बुद्धि मुबादेन ताम घोबा म्हि खाल मुला? थेसे हाडला ज्यबा बानीबेहोरग्याम बुद्धि मुबा सोजो म्हि तसी ज्यबा गे लसी उन्नौ। १४तर चुदे एनीगदेला सेमरी डाहदेन ईख थान्सी हाडला जे ग्याम च्याजी भिसम एनीगदेसे बुद्धि मुला भिसी घमण्ड थालउ। चुहङ् लसी हाडसे हाडदान बुद्धि मुला भिसी भ्रबा चा सत्य तामदा बिरोध लसी हाडसे हाडदान फट्टा स्होबा हिन्ना। १५चुहङ्बा ज्ञान बुद्धि चा परमेश्वरग्याम खबा ज्ञान बुद्धि आहिन। तर जम्बुलिङला आज्यबा तामदेन म्हिला सेमग्याम ओच्छे शैतानग्याम खबा हिन्ना। १६तिगदा भिसम जुन ग्लारी डाहदेन ईख थान्सी हाडला जे ग्याम च्याला, थेरी खाइमै ढिक्सी चिआखम। थेरी जम्मान पाप गे जे तला।

१७तर परमेश्वरग्याम खबा ज्ञान

बुद्धिला मुल ताम चा चोखो हिन्ना। ओच्छे शान्ति भबा, जम्मानदेन छ्याम ढिक्सी चिखम्बा, सोजो, दयासे प्लिङ्बा, जम्मान गे ज्यबा लबा, खालैला ली च्यासी गे आलबादेन खालैदा चिप्ले ताम आलबा तमुला। १८शान्ति भबागदेसे शान्तिरीन चिसी म्हिगदेला ओन्छाडरी परमेश्वरसे म्हन्बा अन्छारला गे लबान निला।

जम्बुलिङला स्हेगदेदा माया लबा

✕ एनीगदे न्हडरी छेबा बङ्बा तिग तामसे तना लबा हिन्ना? एनीगदेसे हाड हाड जे मोजमजा लइ भिसी म्हन्बा लोभ सेमसे लमान आहिन? २एनीगदेसे जुन स्हे म्हाइमुला थे आयाङ्मुला। थेतबासेलमा एनीगदेसे म्हि साइमुला। एनीगदेसे ल्हानान लोभ लमुला, तर आयाङ्मुला। थेतबासेलमा एनीगदे हाड हाड न्हडरीन छेबा बङ्बा लमुला। एनीगदेसे जुन स्हे म्हाइमुला थे स्हे एनीगदेदेन छ्याम आरे। तिगदा भिसम एनीगदेसे परमेश्वरदेन छ्याम आहीमुला। ३ह्हीसैनोन एनीगदेसे आयाङ्मुला। तिगदा भिसम एनीगदेसे मोजमजा लबाला लागिरी आज्यबा सेम थोसी ह्हीमुला।

४विश्वास आरेबा म्हिगदे, जम्बुलिङला जम्मान स्हेदा माया लबा चा परमेश्वरदेन शत्रु स्होबा भिबा ताम एनीगदेदा था आरे? च्यागो, जुन म्हिसे जम्बुलिङला

जम्मान स्हेदा माया लला थेसे ह्वाडसे
ह्वाडदान परमेश्वरला शत्रु स्होला।
५तिग बचनरी चुहङ् भिसी भिबा ताम
एनीगदेसे गे आखेल्बा ताम भिसी
म्हन्बा? “परमेश्वरसे य्हाड न्हडरी
थान्बा आत्मा चा ल्हानान डाहसे
प्लिङ्बा मुला।” ६तर परमेश्वरसे
थेहङ्बा डाह लबा आत्माग्याम
फेबारी भन ल्हाना दयामाया लमुला।
थेतबासेलमा परमेश्वरला बचनरी
चुहङ् भिसी भिबा मुला,

“परमेश्वरसे घमण्डीगदेदा बिरोध
लला,
तर सोजो म्हिगदेदा चा दयामाया
लला।”*

७थेतबासेलमा एनीगदे सदन
परमेश्वरला तहरी चिउ, ओच्छे
शैतानदा बिरोध लउ। जमाहेन्से
थे एनीगदे मुबा ग्लाग्याम यार्ला।
८एनीगदे परमेश्वरला डामरी खउ,
ओच्छे परमेश्वरएनोन एनीगदेला
डामरी फेप्खला। थेतबासेलमा
पापीगदे, आज्यबा गे लबा या
चोखो स्होउ। ओच्छे सेम न्ही मुबा
म्हिगदे, एनीगदेला सेम चोखो स्होउ।
९एनीगदे दुख ड्हम्सी क्राबा क्रिङ्बा
लउ। एनीगदे ताङ्सी ड्येःबा भन्दा
क्राबा क्रिङ्बा लसी चिउ। १०एनीगदे
प्रभुला डाच्छा सोजो म्हि दोगो,
ओच्छे थेसेन एनीगदेदा घेन म्हि
स्होला।

स्थहान्दोदा दोष थालउ

११ज्योज्यो आले नाना आडागदे,
एनीगदेसे गिकसेम गिकदा बिरोध
लसी आज्यबा ताम थापाङ्गो। तिगदा
भिसम जुन म्हिसे ह्वाडला ज्योज्यो
आले नाना आडादा बिरोध लसी
दोष लला थेसे परमेश्वरला ठिमदा
बिरोध लसी दोष लबा हिन्ना। चुदे
एसे परमेश्वरला ठिमला दोष उन्जी
भिसम ए ठिम अन्छार भ्रबा म्हि
आहिन। तर ठिमला निसाफ लबा
म्हि हिन्ना। १२च्यागो, ठिम स्होबादेन
निसाफ लबा मी परमेश्वर जे हिन्ना।
थेदेन छ्याम जे नाश लबादेन थाना
लबा शक्ति मुला। तर ह्वाडला
खिम्जेमगदेदा दोष लबा एनीगदे चा
खाल हिन्ना?

परमेश्वरसे म्हन्बा अन्छार भ्रउ

१३“तिनी न्हडगरनोन य्हाड शहर
गिकरी निसी थेरीन तिदिङ चिसी
व्यापार लला। ओच्छे धन सम्पत्ति
स्होला” भिसी पाङ्बा म्हिगदे डाला
ताम ड्यान्गो।* १४न्हडगर तिग तला
भिबा ताम एनीगदेदा तिगैनोन था
आरे। एनीगदेला जुनी तिग हिन्ना
भिबा तामएनोन था आरे। च्यागो,
एनीगदेला जुनी मी लडबु हङ्बान
हिन्ना। थे छिन्नडरीन थोन्मुला
छिन्नडरीन म्हामुला। १५चुहङ् भिबा

भन्दा मी एनीगदेसे “चुदे परमेश्वरला सेम मुसम य्हाड सोसी चुहङ् लला थेहङ् लला” भिसी पाङ्तो:मुबा।^{१६}तर दान्दे एनीगदे ल्हानान घमण्ड लसी धाक उन्मुला। चुहङ् लसी धाक उन्बा चा पाप हिन्ना।^{१७}खालैसे ज्यबा लतो:ला भिसी था याङ्सीनोन ज्यबा आलनी भिसम थेसे पाप लबा हिन्ना।

फ्युकपो म्हिदा पाङ्बा ताम

५ फ्युकपो म्हिगदे, एनीगदेसे डाला ताम ड्यान्गो, एनीगदेथोरी खबारी छ्याइबा दुखला लागिरी क्राबा क्रिङ्बा लसी चिउ।^२एनीगदेला धन सम्पत्ति नइबा मुला ओच्छे क्वानगदे बुलुङसे चसी जिन्बा मुला।*^३ओच्छे एनीगदेला म्हर म्हुइरी खिया खबा मुला। थेनोन खियासे एनीगदेला दोष उन्ना। ओच्छे थेनोन खियासे एनीगदेला ल्हुइ मेसे हङ् लसी क्रोसी नाश लला। तसैनोन परमेश्वरसे निसाफ लबा चु धिनरी एनीगदेसे ल्हानान धन सम्पत्ति सोसी थान्बा मुला।^४एनीगदेसे हाडला बुरी गे लबा म्हिगदेदा पिन्तो:बा ज्यालाएनोन पिन्बा आरे। च्यागो, थेनीगदेदा पिन्तो:बा ज्यालासेन क्रिङ्सी एनीगदेदा बिरोध लला। जम्मान भन्दा शक्तिशाली परमेश्वरसे बुरी गे लबागदे क्राबा क्रिङ्बा लबा थे:सी जिन्बा मुला।*^५एनीगदेसे जम्बुलिङरी

ल्हानान मोजमजा लसी चिबा मुबा, एनीगदेसे हाडसे हाडदान साइबाला लागिरी थान्बा जन्तु हङ् लसी छोना लसी थान्बा मुला।^६एनीगदेदा बिरोध आलबादेन तिगै दोष आरेबा म्हिगदेदा एनीगदेसे दोष उन्सी साइजी।

जस्तोन दुख तसै नागो

^७थेतबासेलमा ज्योज्यो आले नाना आडागदे, प्रभु फेप्खबा धुइ आततेधोना भ्रान्सी चिउ। च्यागो, खेती लबा म्हिसे ज्यबा बाली याङ्ला भिबा आश लसी सेख्खदेन बर्खला नाम आखतेधोना भ्रान्सी चिमुला।^८एनीगदेएनोन थेहङ् लसीन भ्रान्सी विश्वासरी कोङ्सी चिउ। तिग्दा भिसम प्रभु फेप्खबा धुइ खसी जिन्बा मुला।^९ज्योज्यो आले नाना आडागदे, एनीगदे हाड हाड न्हङरी दोष थालउ। परमेश्वरसेनोन एनीगदेला दोष उन्सी निसाफ आल। तर च्यागो, निसाफ लबा चा प्रापरीन मुला।

^{१०}ज्योज्यो आले नाना आडागदे, एनीगदेथोरी खबा दुख नासी चिबारी प्रभुला मिनग्याम ताम पाङ्बा अगमवक्तागदेसे नाबा दुखदा ढन्गो।^{११}थेनीगदेसे जम्मान दुख नाखम्बासे लमा य्हाडसे थेनीगदेदा मान लमुला। ओच्छे अय्यूबसेनोन जम्मान दुख नाखम्जी भिबा तामला बारैरी एनीगदेसे थे:बा मुला। थेहङ् लसीन

प्रभुसे लिच्छा अय्यूबदा दोःसी जम्मान
स्हे पिन्जी भिबा ताम एनीगदेदा थानोन
मुला। प्रभुसे ल्हानान माया उन्सी दया
लमुला।*

१२ डाला ज्योज्यो आले नाना
आडागदे, जम्मान भन्दा घेन ताम
चा एनीगदेसे स्वर्ग, जम्बुलिङ्गदेन
अर्गु तिगै स्हेला मिन किन्सी खाइमै
घ्रान थाफागो। बरु “हिन्ना” भिसम
“हिन्ना” भिउ “आहिन” भिसम
“आहिन” भिउ। थेहङ् लजी भिसम
परमेश्वरला डाच्छा एनीगदेला तिगै
दोष आत।*

विश्वासला प्रार्थना

१३ एनीगदे न्हङरी खालैदा दुख
तबा मुसम थेसे प्रार्थना लउ। ओच्छे
खालै ताङ्बा मुसम थेसे परमेश्वरदा
जयजयकार तबा व्हाइ गोउ।
१४ थेहङ् लसीन एनीगदे न्हङरी खालै
आखम्बा मुसम थेसे मण्डलीदा
च्याबा म्हिगदेदा ड्योङ्गो। ओच्छे
मण्डलीदा च्याबा म्हिगदेसे थे म्हिदा
प्रभुला मिनरी छ्युगु फोर्सी प्रार्थना
लगै।* १५ विश्वास लसी लबा
प्रार्थनासे आखम्बा म्हिदा खम्ना

लला। ओच्छे प्रभुसे थेदा पूरान खम्ना
लला। चुदे थेसे पापनोन लबा मुसै
माफ याङ्गला। १६ थेतबासेलमा एनीगदे
हाङ हाङसे लबा पापगदे गिकसेम
गिकदा पाङ्गो। ओच्छे एनीगदे
खम्बाला लागिरी गिकसेम गिकदा
प्रार्थना लउ। च्यागो, परमेश्वरसे
म्हन्बा अन्छार भ्रबा म्हिसे लबा
प्रार्थना शक्तिशाली तमुला, ओच्छे
थेग्याम उदेकला गे तमुला।

१७ एलियाएनोन य्हाङ हङ्बान
म्हि मुबा। थेसे नाम थाखगै भिसी
सेमहेन्सेन प्रार्थना लमा सोम
दिङ्गसे ला दुधोना जम्बुलिङ्गरी नाम
आखनी।* १८ दोःसी थेसे नाम खगै
भिसी प्रार्थना लजी। जमाहेन्से नाम
खसी बाली नाली ज्यबा तजी।*

१९ डाला ज्योज्यो आले नाना
आडागदे, एनीगदे न्हङरी खालै म्हिसे
सत्य ग्याम ख्लासी निमा खालैसे थेदा
दोःसी भजी भिसम, २० थेसे चु ताम
थाम्लेःगै, जुन म्हिसे आज्यबा ग्यामरी
भ्रबा पापी म्हिदा दोःसी भला थेसे
थेदा सिबाग्याम जोगब लला, ओच्छे
ल्हानान पापगदेला पापला दोष मेटब
तला।*